

Paite - Sepaihte'n Laisiangthou - Soldiers Scriptures

Efesate 6:10-18

10 Atawppenin, ka sanggamte aw, Toupa ah leh a thahatna vanglianpi ah thahat suah un. **11** Pathian' galvan kimin kivan un. Tuachi-in, daw-mangpa' zekhemnate na nang zou ding uhi. **12** Ahang bel, i doute sa leh sisan nei ahi kei uh a, tu huna, mial tunga vaihawm kumpite, thuneihna neite, vangletna neite leh vanmunte-a kha gilou honte ahi zaw uhi. **13** Tua ahih manin, Pathian' galvan kim la un. Tuachi-in, ni hoihlou ah amaute na nang zou ding uh a, na nan zawh khit nungun zong na ding lai ding uhi. **14** Tua ahih manin, thutaka kawng gaksain, diktatna awmphaw silhsain om unla, **15** lemna tangthupha-a kisakkholhna khedap bunsain om un. **16** Tua teng baan ah, upna lum la un. Tua lum pansanin giloupa' thalkuangtheite na hihmit thei ding uhi. **17** Tua chiangin, hotdamna siklukhu leh Pathian' thu Kha namsau la un. **18** Tua chiangin, thuumna namkim leh ngetna namkimin, hun teng ah Kha ah thuum un. Hibang lungsim neiin, kuhkaltakin kiveng unla, misiangthoute khempeuh adingin thuum gige un.

Phatnalate 91

1 Tungnungpen' neih bukna muna kisela teeng mi, Pathian Vanglianpen' liim nuaia tawldam gige ding hi. **2** Tangtawn Toupa' tungthu ah: Amah ka bukna leh ka kulhpi hi. Amah ka Pathian hi a, amah muang ding hi'ng, chi ding hi'ng. **3** Ama'n vasabeng mi' thang apan hon humbit ding a, hileeng lauhuai apan hon humbit ding hi. **4** Ama'n a khate-a nang hon khuh ding a, a khalim nuaia bu ding na hi. A muanhuaina na lum lian leh na lum neu hi ding a, **5** zanlaia mulkimna lau lou ding chin a, suntang laia thaltang leeng zong lau lou ding na hi. **6** Miallaka hileeng zong lau lou ding chin a, sunlaia siatna zong lau louding na hi. **7** Na siik ah 1,000 pukin, na taklam ah 10,000 puk

mah leh, sihna in nang hon naih lou ding hi. 8 Na mita en lei ding chin a, mi diktatloute' gamtatna mu lei ding na hi. 9 Ahang bel, ka bukna ahipa Tangtawn Toupa tua Tungnungpen mah na teenna-a bawlta na hih leh, 10 na tunga thil hoihlou tung lou ding a, natpi zong na puanbuk naiha tung lou ding hi. 11 Ahang bel, ama'n na tungthu-a a vansawltakte thu pe ding a, na lampi tenga hon veeng ding uh hiven. 12 Suanga na khe na tah khak louh nadinga amaute'n khuta hon na dom ding uhi. 13 Humpinelkai leh mualtan sik ding chin a, humpinelkai lunlai leh gulpi sikden ding na hi. 14 Tangtawn Toupa'n: Ama'n kei hon it mana amah hukhe ding hi'ng. Ama'n ka min a theihsak mana amah domkhetou ding hi'ng. 15 Ama'n kei hon sam ding a, dawng ding hi'ng. A lungkham chianga ompih ding ing a, hukhe ding ing a, pahtawi lai ding hi'ng. 16 Damsawtna-a amah taisak ding ing a, ka hotdamna musak ding hi'ng, chi hi.

Phatnalate 18

Lapulian ading. Tangtawn Toupa' Sila David' Phatnala. A melmate khempeuh leh Saul apan Tangtawn Toupa'n a humbit laia Tangtawn Toupa' maia hiai La-thute a Gen. 1 Tangtawn Toupa, ka hatna aw, nang hon it mahmah hi'ng. 2 Tangtawn Toupa ka Suangpi, ka kulhpi leh kei hon hukhepa hi. Ka Pathian ka Suangpi, ka Bukna hi ahi. Amah ka Lum hi a, ka Hotdamna kii, ka kulhpi ahi. 3 Tangtawn Toupa sam hi'ng. Amah zaw phat taak hi ahi. Ka galte apan hotdam a om hi'ng. 4 Sihna khauhualte'n hon vial a, siatna hawktui luangte'n hon tuum hi. 5 Misikhua khauhualte'n hon vial a, sihna thangte ka maia om hi. 6 Mangbanga Tangtawn Toupa sam ing a, ka Pathian sam hi'ng. Ama'n a tempul apan ka aw za a, ka kikou aw a maia ging a, a bil tungtou hi. 7 Lei kiliing a, kivuang a, mualte kingakna suangphumte liing hi. Amah heh ahih mana amaute kiliing uhi. 8 A nakvangte apan meikhu kitung a, a kam apan kangtumthei meikuang pawt a, tua apan meiamte pawtkhia hi. 9 Ama'n vaante phenvang a, hong kumsuk a, meipi vomte siiksuk hi. 10 Amah Cherubte tunga tuangin leng a, huih khate tunga tuangin sangpi-a lengtou hi. 11 A kimkota kikkhuh

nadingin khawmial bawl a, a tunga khuhsuk dingin tua vuah pua van meivomte bawl hi. 12 Ama' omna vak taangpha apan meipite paikhia a, gialpi leh keekte tawh ton hi. 13 Vaan apan Tangtawn Toupa vanpi-in ging a, Tungnungpen aw in thawn hi. 14 Ama'n thaltangte kaapkhia a, galte thehzak a, kek sawl a, amaute phiatmang hi. 15 Tangtawn Toupa aw, nang heha sal chin a, na nakvanga hu na phit chiang a, tuipi sung kuam thuukte hong dawk a, leitung kingakna suangphumte kihawkkhia-a hong dawk hi. 16 Ama'n tungsaang apan hon sawksuk a, hon len a, tuithuukte apan hon domkhia hi. 17 Ama'n a haat mahmah ka galte apan hon humbit a, kei adinga hat lua ka melmate apan hon hukhia hi. 18 Amaute'n ka tuahsiat ni-a hon maituah uh a, ahihanga, Tangtawn Toupa kei hon huhpa hi ahi. 19 Ama'n mun awngthawl hon tun a, ka tunga lungdam ahih mana hon hukhia ahi. 20 Tangtawn Toupa'n ka diktatna banga ka tunga hihta a, ka khut siangthouna banga hon dinkik hi. 21 Ahang bel, ke'n Tangtawn Toupa' lampite tawn ing a, ka Pathian apan lampiala thil diklou hih lou hi'ng. 22 A dante khempeuh ka maia om a, a thusehte pialsan lou hi'ng. 23 Ama' maia genbaanglousa om ing a, khelhnate apan kikem hi'ng. 24 Tangtawn Toupa'n ka diktatna bangbang leh, a mitmuha ka khut sianna bangbanga hon dinkikta hi. 25 A muanhuaite tunga a muanhuaia kilaak chin a, genbaangloute tunga genbaanglousa kilaak na hi. 26 A siangte tunga a sianga kilaak chin a, lungsim kawite tunga lemtheitaka kilaak na hi. 27 Nang a kingainiamte hondam chin a, a kisatheite bel en chin a, niamsak na hi. 28 Tangtawn Toupa aw, nang ka meivak kuangsak chin a, ka Pathian aw, nang ka khawmial vaak suaksak na hi. 29 Nang' huhna tawh sepaihhonte naih ngam ing a, ka Pathian tawh kulhbaang kal thei hi'ng. 30 Pathian zaw a lampi hoihkim a, Tangtawn Toupa' thu dikkim hi. Amah zaw amah beelte khempeuh adinga lum hi ahi. 31 Tangtawn Toupa loungal Pathian dang kua om ahia? Eite' Pathian loungal Suangpi kua dang om ahia? 32 Pathian ahi thahatna tawh hon thum a, ka lampi hoihkimsak. 33 Ama'n ka khete zukpi khete banga bawl a, munsang ahte hon dingsak hi. 34 Amah ahi ka khutte galdou dan sinsak a, ka baante'n sumsan thalphen lai zou hi. 35 Nang na vualzawhna lum hon pia chin a, na khut taklam in hon dingzousak hi. kei hon liansak dinga hong kuunsuk na hi. 36 Nang ka nuaia ka lampi liansak

chin a, ka siakguhte kihék lou hi. 37 Ka galte delh ing a, pha ing a, amaute hihmanthat ahih mateng uh kilehkik lou hi'ng. 38 Amaute thou zou nawn lou dinga sikzan ing a, ka khe nuaia puk uhi. 39 Nang kidou dinga thahatna-a hon thuam chin a, kei langte ka khe nuaia kuunsak na hi. 40 Ka galte taikeksak chin a, ka melmate hihmangthangta hi'ng. 41 Amaute huhna ngena kikou uh a, hukhe ding kuamah omlou hi. Tangtawn Toupa nangawn sam uh a, ama'n dawng tuan lou hi. 42 Ke'n amaute huihmut mang leivui banga gawivui ing a, konglak buannawi banga bungkhia hi'ng. 43 Nang ka mite' hon douna apan hon hukhia chin a, namte lutanga hon bawl na hi. Ka theih ngeilouh mite ka nuaia lut uhi. 44 Gamdang mite ka nuaia ton uh a, ka aw a zak phet chiang ua ka thu mang pah uhi. 45 Amaute khempueh lungkia uh a, a kulhpite ua-pan liing kawmkawma hong paikhia uhi. 46 Tangtawn Toupa hing hi! Ka Suangpi phatin om hen! Pathian ka Hondampa pahtawiin om hen! 47 Amah zaw ka phuba hon laaksakpa Pathian hi a, namte ka nuaia koihpa hi a, 48 ka galte apan hon hukhepa hi ahi. Nang ka galte tunglam peka hon pahtawi chin a, hiamgamte apan hon humbit na hi. 49 Tuabang ahih mana Tangtawn Toupa aw, namte laka nang hon phat ding ing a, na min phata la sa ding hi'ng. 50 Ama'n a kumpipa vualzwhna thupite pia a, a thaunilhpa David leh a suan a khakte tunga chitna peden den hi.

Pastor T. John Franklin
Church of Salvation, Healing, and Deliverance
COS-HAD.org